



Reykjavík, 13.02.2019
Tilv. 2019/0150 - 0.0.01
SGI

Efni: Umsögn Neytendastofu um drög að reglugerð um merkingar á umbúðum rafrettna

Vísað er til máls nr. S-33/2019, um drög að reglugerð um merkingar á umbúðum rafrettna og áfyllinga og efni upplýsingabæklings sem fylgja skal rafrettum og áfyllingum. Neytendastofa þakkar tækifærið til að tjá sig um málið og vill vekja athygli á athugasemnum er að neðan greinir.

I. Athugasemdir við einstakar greinar reglugerðarinnar

Neytendastofa leggur til að gerðar verði breytingar á uppsetningu 4. og 5. gr. reglugerðarinnar. Í 3. gr. reglugerðarinnar er fjallað um viðvörunarmerkingar á umbúðum rafrettna og áfyllinga. Neytendastofa leggur til að 5. gr. í drögum að reglugerðinni, þar sem kveðið er á um texta viðvörunarmerkinga á umbúðum rafrettna og áfyllinga verði að 4. gr. og komi því í beinu framhaldi af fyrirmælum 3. gr. Þá verði 4. gr. í drögum að reglugerðinni að 5. gr. Stofnunin vísar til þess að í sænskri og danskri reglugerð sé fyrirmælum um viðvörunarmerkingar og texta þeirra skipað í sömu grein. Sjá m.a. 17. gr. sænskrar reglugerðar um merkingar nr. 429/2017 (Förordning om elektroniska cigaretter och påfyllningsbehållare) og 13. gr. danskrar reglugerðar nr. 499/2016 (Bekendtgørelse om kvalitet, mærkning, alderskontrolssystem og reklame m.v. af elektroniske cigaretter og genopfyldningsbeholdere m.v.). Telur Neytendastofa breytinguna stuðla að skýrari uppsetningu, sbr. eftirfarandi:

3. gr.

Viðvörunarmerkingar á umbúðum rafrettna og áfyllinga.

Viðvörunarmerkingar á umbúðum rafrettna og áfyllinga sem hvoru tveggja innihalda nikótín skal prenta með svörtu Helvetica-feitletri á hvítum grunni og þekja 30% af yfirborði umbúða. Merking skal vera í svörtum ramma, sem er 1 mm á breidd, inni á yfirborðsletinum sem er frátekinn fyrir slíkar merkingar.

4. gr.

Texti viðvörunarmerkinga á umbúðum rafrettna og áfyllinga.

Texti viðvörunarmerkingar á umbúðir rafrettna og áfyllinga sem hvoru tveggja innihalda nikótín skal vera eftirfarandi: „Þessi vara inniheldur nikótín sem er mjög ávanabindandi efni. Ekki er mælt með notkun þess fyrir þá sem reykja ekki.“

Texti viðvörunarmerkingar skal vera samsíða almennum texta á umbúðum.

5. gr.

Umbúðir rafrettna og áfyllinga.

Á einingapökkum og öllum ytri umbúðum rafrettna og áfyllinga skal birta lista yfir öll innihaldsefni vörunnar í lækkandi röð eftir þyngd og upplýsingum um nikótíninnihald vörunnar og gjöf í hverjum skammti, lotunúmer og tilmæli um að varan sé geymd þar sem börn ná ekki til.

Umbúðir skulu ekki gefa í skyn að tilteknar vörur miði að því að draga úr áhrifum einhværra skaðlegra innihaldsefna í reyk.

Óheimilt er að hafa á umbúðum rafrettna og áfyllinga eitthvað sem gefur í skyn að varan hafi eiginleika sem geti aukið lífsþrótt eða orku eða hún hafi lækningamátt, hafi yngjandi eða náttúrulega eiginleika, sé lífræn eða hafi annan ávinning fyrir heilbrigði eða lífstíl.

Umbúðir skulu ekki líkjast matvælum eða snyrtivörum.

Á umbúðum skal ekkert koma fram sem gefur til kynna að tiltekin vara hafi aukinn lífbrjótanleika eða annan umhverfislegan ávinning.

II. Tillögur og athugasemdir

Í drögum að reglugerðinni eru sett fram skilyrði sem eru í samræmi við tilskipun 2014/40/ESB. Þann 1. mars 2019 taka gildi lög nr. 87/2018 um rafrettur og áfyllingar fyrir rafrettur. Neytendastofa telur að þau skilyrði sem koma fram í drögum að reglugerðinni feli í sér jákvætt skref í átt að því að veita neytendum góðar upplýsingar og í samræmi við það fagnar stofnunin því að gert sé að skilyrði að upplýsingabæklingur og viðvaranir séu á íslensku.

Stofnunin telur mikilvægt að merkingar og aðrar upplýsingar sem vöruna varða séu auðlæsilegar og skiljanlegar fyrir neytendur og leggur til að kveðið verði á um það í reglugerðinni. Neytendastofa telur einnig mikilvægt að stofnuninni verði veitt heimild til að gefa út fyrirmæli um kröfur til merkinga, umfram það sem greinir í reglugerð, með sambærilegum hætti og gert hefur verið í Svíþjóð með reglugerð nr. 429 frá árinu 2017 (Förordning um elektroniska cigaretter och påfyllningsbehållare). Í því sambandi má benda á að stofnunin hefur reynslu og þekkingu af útgáfu fyrirmæla með útgáfu reglna um verðmerkingar, sbr. 18. gr. laga nr. 57/2005 um eftirlit með viðskiptaháttum og markaðssetningu.

Neytendastofa leggur því til að stofnuninni verði veitt heimild til að gefa út og mæla fyrir um nánari fyrirmæli um viðvörunarmerkingar, umbúðir rafrettna og áfyllingar og upplýsingabækling með því að bæta við nýrri grein. Með vísan til þess leggur Neytendastofa til að 7. gr. reglugerðarinnar verði svohljóðandi:

7. gr.

Fyrirmæli um viðvörunarmerkingar, umbúðir og upplýsingabækling

Viðvörunarmerkingar, merkingar á umbúðum og upplýsingabækling skal rita á þann hátt að upplýsingar séu auðlæsilegar og skiljanlegar.

Neytendastofu er heimilt að gefa út nánari fyrirmæli um viðvörunarmerkingar, merkingar á umbúðum og upplýsingabækling fyrir rafrettur og áfyllingar fyrir þær.

Neytendastofa vísar einnig til umsagnar Umhverfisstofnunar á samráðsgátt, dags. 13. febrúar 2019, þar sem tekið er fram að skoða þurfi hvort vísa eigi til reglugerðar nr. 415/2014 um flokkun, merkingar og umbúðir efna og efnablandna sem innleiðir reglugerð (EB) nr. 1272/2008 um sama efni (CLP-merkingar). Neytendastofa er reiðubúin að koma að samningu ákvædis þess efnis í samvinnu við Umhverfisstofnun og ráðuneytið.

Neytendastofa bendir á að skoða þurfi vel hvort sérstakt ákvæði eigi að vera í reglugerðinni sem miðar að því að gera óheimilt að markaðssetja vökva sem t.d. sælgæti eða tyggjókúlur eða á annan hátt í umbúðum sem höfða sérstaklega til barna.

Neytendastofa hefur að svo stöddu ekki fleiri athugasemdir fram að færa en stofnunin er reiðubúin að veita frekari upplýsingar eða aðstoð óski ráðuneytið eftir því.

Virðingarfyllst
f.h. Neytendastofu



Svava G. Ingimundardóttir
Lögfræðingur